

michel-rolph trouillot

TI DIFÉ BOULÉ
SOU
ISTOUA AYITI

KOLEKSYON LAKANSYÈL

©1977 Michel-Rolph Trouillot

*sou lavanyans profèsè yè
ak lizaj jinnjan jodi
pou bèlté ti mounn démin
min nan min
ak ou
makòmè
fanm-kay mouin
bò gòch mouin
san mank*

m-r-t.

Mouin voyé youn grap mèsi bay tout fanmi, tout zanmi-kamarad ki ridé-m jan yo té kapab nan mété li sa-a sou 2 pié-l. Apré mèsi pa Kétli-a, m-ap di Lionel, Évli-n ak Janrobé youn mèsi espésial poutèt fòs ponyèt yo té bay.

m-r-t.

« Lizaj jénérasyon ki pasé yo
pézé kou poua 50 sou sèvèl
ti nèg kouliéla-a. »

**1. *M -pral fè
youn
rasanbléman***

*M-pral fè
youn rasanbléman
pou m-konin sa k-rivé
fanmi-m yo
anyé ro!*

Lannouit té blayi kò-l sou do mòn yo. Youn ti van lapinn tap souflé, min timounn yo pat sispann joué. Sédènié tap kouri dèyè Aséfi, ti vant li gonflé al move grès, ti mizèrikòd li byin pandié nan fè noua-a Anro nan sièl, lali-n tap fouré jé-l anba jipon zétoual min, tou pré, bò lantouraj la, 3 koukourouj tap fè lago ak lamizè.

Lamèsi brasé difé-a, li jété youn moso boua, épi li di :

— Timounn, sispann !

Tout granmounn yo lévé tèt. Lamèsi gade yo. Yo té si telman anpil, li pat fouti konté yo tout. Tipous té la, Roro té la, Fifi té la...Voklin té vi-n ak tout tanbou-l. timari té poté kafé. Néréstan té gin kèk nékannn li té koupé an ti miyèt pou tout mounn té ka jouinn moso.

Lamèsi di ;

— Fanmi yo, nou fè rasanbléman sila-a pasé Grinn Prominnin tounin. Dépi sou prézidan Tibab, nou té voyé Grinn Prominnin chèché dinnie bout mizè nou. Nou té voyé-l chèché ki mò k touyé Lanprè, ki mò ki-touyé Tipiè, Séfanm·ak Marilis... ki mò k-ap sousé fanmi an jouk jounin m-ap palé la-a. Nou té ba-l bouè, n-té bal manjé. Nou té bal bon réchany poul-té fè larout san prann souf. Jou pasé, dlo koulé, défin papa-m gin tan pati. Gin nèg ki té kòmansé di Grinn Prominnin ginlè mouri. Gin lòt ki té kouè li bat ba. Épi matin an, m-byin sézi, mouin tap binyin nan tèt dlo-a, kilès mouin ouè? Grinn Prominnin! Laj té kòmansé ba-l payèt, figil-l té parèt fatigé, épi... kòm ki diré... (sa pat fè-m plezi di tou) li té gin younn pòz mounn lavil. Min kè-pozé vidé sou mouin lè li bo-m 2 bò, épi l-di : "Sò Lamèsi, kouraj, ou mèt sonnin rasanbléman an, n-ap konn sa k-rivé fanmi yo."

— Inbin koté-l ? Fè l-pale l non !

Lamèsi voyé jé-l dèyè, li gadé touf kandélab la. Touf kandélab la ouvri. Nèg la vansé, tèt li bésé.

— Fanmi yo, m-di : Onè

— Réspè, Grinn Prominnin.

Ti van lapinn nan sispann koulé. Nonm nan touse janm kanson-l chita sou chouk boua-a nan mitan Tisé ak Fanfan.

— Fanmim yo, mouin poté nouvèl. Dépi sou prézidan Tibab, sé prominnin m-ap prominnin. Mouin ouè mòn, m-ouè larivière. Mouin ouè savann, mouin ouè lanmè. Mouin kalé jé-m sou lòt péyi, m-aprann palé langaj... Min lè m-rési rantré nan lakou tan lontan, mouin ouè si tout bon vré nou désidé jouinn bout maladi-a, fò nou viré gadé dèyè...Fò n-fè vizion tout kriz ki té pasé nan fanmi-a, fò nou chèché ki mak yo kité nan san nou.

— Min, nou pa konn sa k-té pasé. Minm Grann André Miz ki té fèt dikdantan sou prézidan Silvin Salnav, pa konn sa Lanpèrè té di

— Inbin, sé sa mouin vi-n fè la. Sé sa asé mouin vi-n fè la-a. Mouin sot nan péyi tan lontan pou m-rakonté nou sa k-té fèt. Mouin sot nan péyi profondé pou m-palé langaj la ban ou. Mouin...sé tou sa m-ka fè...mouin sot trò louin...

Ti van lapinn nan rétownin, li tizonnin flanm difé-a. Flanm difé-a monté, monté, li klere tout fanmi yo. Grinn Prominnin viré gadé Sédènié :

— Sila-a fèt dèyè do-m, pa vré ?

— Sila-a pami sa k-fèt dèyè ou yo, oui. Sé dènnié-a. Sa k-té vi-n apré-l la mouri. Min Loulouz gin tan grès ankò.

Van lapinn nan pati ak paròl la. Sé dènnié mét tèt li sou zépòl Aséfi. Grinn Prominnin graté goj li. Anro nan sièl, zétoual tap bay lali-n gabèl, min tou pré, bò lantouraj la, 7 koukourouj tap lonje douèt sou lamizè.

Grinn Prominnin di konsa...

An Janvié 1820, Jénéral Janpyè Bouayé, prezidan d-Ayiti, rantré nan Jérémi. Li pran younn kominiké pou fè konnin alaronnbadè, atout yo pat rési mét min sou Goman, Malfèt ak Malfou (3 pi gro chèf yo), lamé-a té rivé krazé dinnè bann maron k-tap simin “dézòd ” nan peyi-a.

Janvié 1820, Bouayé rantré Jérémi. Oktòb 1820, Bouayé rantré Okap. Févriyé 1822, l-antré Sanntodomin-ngo. ...Avril 1825, Lafrans rékonèt lindépendans Ayiti.

Youn kokinn chinn kriz té kaba. Apré 30 an goumin youn lòt sosiété — sosiété n-lévé jouinn nan — té parèt sou tè d-Ayiti. Ak youn lòt kalité chèf. Youn lòt kalité ésklav. Youn lòt kalité maron.

Pou n-konprann sosiété sa-a, sosiété pa nou-an, fò nou rivé konnin ki kalité lavi ki disparèt nan rajé-a ak 3 maron Lagrandans yo. Pou nou rési konnin ki maladi n-soufri, fò nou rivé konnin ki maladi k-pasé nan san-n.

Jodi-a, nou gin laminrèt, min, n-pa fouti fè tout san n-vlé. Nou sèl responsab démin, min yérosoua la nan dingon-n. Nou sèl gin doua chouazi, min kondision jouèt la ékri davans, é sé pa nou k-té ékri yo.

Soti 1789 rivé 1820, youn **kriz-nan-mouèl** sézi péyi d-Ayiti. É sé pandan kriz sa-a , pandan 30 grinn ané sa yo, tout lantouraj sosiété nou lévé jouinn nan té bati. **Chay jénéraion k-alé yo pézé kou poua 50 sou sèvèl ti nèg kouniéla-a.**

Soti 1789 rivé 1820, pèp ayisyin an réyalizé sèl grinn Révolision ésklav nan tout souvnans limanité. Min pandan minm 30 an sa yo, youn klas natif-natal lévé kokin sou do pèp la, li dètounin révolision an. É si n-vlé konnin tout bon vré ki maladi n-soufri **jodi-a**, fò nou réfè chimin kriz sa-a. Sou la min gòch, youn révolision ; sou lamin douat, younn dappiyanp.

Épi, lè tout sann yo fi-n frèt, lè Bouayé rantré Jérémi, mouin minm...yo minm...**ou minm !**

Sò Lamèsi, tanpri, banm ti tak té koton. Paròl sa-a mandé rafréchi...